

**O‘ZBEKISTON RESPUBLIKASI ISTIQBOLLI LOYIHALAR MILLIY AGENTLIGI  
DIREKTORINING  
BUYRUG‘I**

**INVESTITSIYA PLATFORMALARI SOHASIDA “TARTIBGA SOLISH QUMDONI”  
MAXSUS HUQUQIY REJIMINI TAQDIM QILISH TARTIBI TO‘G‘RISIDAGI NIZOMNI  
TASDIQLASH HAQIDA**

**[O‘zbekiston Respublikasi Adliya vazirligi tomonidan 2026-yil 12-yanvarda ro‘yxatdan  
o‘tkazildi, ro‘yxat raqami 3753]**

O‘zbekiston Respublikasi Prezidentining 2017-yil 27-iyuldagi PQ-3150-son “O‘zbekiston Respublikasi Istiqbolli loyihalar milliy agentligi faoliyatini tashkil etish to‘g‘risida”gi va 2025-yil 21-avgustdagi PQ-255-son “Zamonaviy axborot texnologiyalaridan foydalangan holda amalga oshiriladigan investitsiya faoliyatini tartibga solish chora-tadbirlari to‘g‘risida”gi qarorlariga muvofiq buyuraman:

1. Investitsiya platformalari sohasida “Tartibga solish qumdoni” maxsus huquqiy rejimini taqdim qilish tartibi to‘g‘risidagi nizom **ilovaga** muvofiq tasdiqlansin.
2. Mazkur buyruq O‘zbekiston Respublikasi Raqamli texnologiyalar vazirligi, O‘zbekiston Respublikasi Prezidenti huzuridagi Tadbirkorlik subyektlarining huquqlari va qonuniy manfaatlarini himoya qilish bo‘yicha vakil va Savdo-sanoat palatasi bilan kelishilgan.
3. Mazkur buyruq rasmiy e‘lon qilingan kundan e‘tiboran kuchga kiradi.
4. Mazkur buyruq 2026-yil 1-oktabrgacha amal qiladi.

**Direktor D. LI**

Toshkent sh.,  
2025-yil 9-dekabr,  
21-son  
**Kelishildi:**

**Savdo-sanoat palatasi raisi D. VAXABOV**

2025-yil 15-oktabr

**Raqamli texnologiyalar vazirining birinchi o‘rinbosari O. UMAROV**

2025-yil 14-oktabr

**Tadbirkorlik subyektlarining huquqlari va qonuniy manfaatlarini himoya qilish bo‘yicha  
vakil o‘rinbosari J. URUNOV**

2025-yil 14-oktabr

O‘zbekiston Respublikasi Istiqbolli loyihalar milliy agentligi direktorining 2025-yil 9-dekabrda 21-son  
**buyrug‘iga**  
**ILOVA**

**Investitsiya platformalari sohasida “Tartibga solish qumdoni” maxsus huquqiy rejimini  
taqdim qilish tartibi to‘g‘risidagi**

**NIZOM**

Ushbu Nizom investitsiya platformalari sohasida “Tartibga solish qumdoni” maxsus huquqiy rejimini (bundan buyon matnda maxsus huquqiy rejim deb yuritiladi) taqdim etish, maxsus huquqiy rejim ishtirokchilarini ro‘yxatdan o‘tkazish, ularning faoliyatini monitoring qilish, maxsus huquqiy rejim ishtirokchisi maqomidan mahrum etish, investitsiya platformalari operatorlari reyestrini yuritish, shuningdek investitsiya platformalari faoliyatini amalga oshirish tartibini belgilaydi.

## 1-bob. Asosiy qoidalar

1. Ushbu Nizomda quyidagi asosiy tushunchalar qo'llaniladi:

**investitsiyalarni jalb etishni tashkil etish faoliyati** — investitsiya platformasidan foydalangan holda investitsiyalarni jalb qilish hamda investitsiya kiritishga ko'maklashish xizmatlarini ko'rsatish;

**investitsiya kiritish shartnomasi** — investor va investitsiyalarni jalb qiluvchi shaxs o'rtasida tuziladigan, investitsiya platformasidan foydalangan holda investitsiya kiritishni amalga oshiruvchi shartnoma;

**arizachi** — O'zbekiston Respublikasi rezidenti bo'lgan yuridik shaxs;

**investor** — investitsiya platformasi operatori xizmatidan foydalangan holda investitsiya kiritish faoliyatini amalga oshiruvchi jismoniy yoki yuridik shaxs, shu jumladan O'zbekiston Respublikasi norezidenti;

**investitsiya platformasi** — investitsiyalarni jalb etishni tashkil etish faoliyatini amalga oshirish uchun mo'ljallangan avtomatlashtirilgan dasturiy-texnologik majmua;

**investitsiyalarni jalb qiluvchi shaxs** — O'zbekiston Respublikasi rezidenti bo'lgan yuridik shaxs yoki yakka tartibdagi tadbirkor bo'lib, unga investitsiyalarni jalb qilish xizmatlarini investitsiya platformasi operatori ko'rsatadi;

**investitsiya platformasi operatori** — maxsus huquqiy rejim ishtirokchisi bo'lib, investitsiyalarni jalb etishni tashkil etish faoliyatini amalga oshiruvchi, investorga va investitsiyalarni jalb qiluvchi shaxsga investitsiya platformasiga (jumladan, veb-sayt va mobil ilova orqali) kirish imkoniyatini taqdim etuvchi hamda vakolatli davlat organi tomonidan investitsiya platformalari operatorlari reyestriga kiritilgan yuridik shaxs;

**maxsus huquqiy rejim** — investitsiya platformasi orqali investitsiyalarni jalb etishni tashkil etish faoliyatini amalga oshirish uchun yuridik shaxslarga alohida tashkiliy-huquqiy shart-sharoitlar yaratish;

**investitsiya platformalari operatorlari reyestri** (bundan buyon matnda reyestr deb yuritiladi) — investitsiya platformasi operatori faoliyatini amalga oshirayotgan, ro'yxatdan o'tgan maxsus huquqiy rejim ishtirokchilari to'g'risidagi ma'lumotlar aks ettiriladigan ochiq axborot resursi;

**vakolatli davlat organi** — O'zbekiston Respublikasi Istiqbolli loyihalar milliy agentligi;

**maxsus huquqiy rejim ishtirokchisi** — O'zbekiston Respublikasi rezidenti bo'lgan va maxsus huquqiy rejim ishtirokchisi sifatida ro'yxatdan o'tgan yuridik shaxs.

2. Maxsus huquqiy rejim ishtirokchilarini ro'yxatdan o'tkazish vakolatli davlat organi tomonidan ushbu Nizomning [1-ilovasiga](#) muvofiq sxema asosida amalga oshiriladi.

3. Maxsus huquqiy rejim ishtirokchisi sifatida ro'yxatdan o'tkazish uchun taqdim etilgan arizalarni qabul qilish va ko'rib chiqish bo'yicha vakolatli davlat organining ishchi organi funksiyalarini vakolatli davlat organining Kapital bozorini rivojlantirish departamenti (bundan buyon matnda ishchi organ deb yuritiladi) amalga oshiradi.

4. Ishchi organ:

arizachilarning maxsus huquqiy rejim ishtirokchisi sifatida ro'yxatdan o'tkazish uchun taqdim qilingan arizalarini qabul qiladi va ko'rib chiqadi;

arizachilar tomonidan taqdim etilgan hujjatlarni ko'rib chiqish natijalari bo'yicha vakolatli davlat organi rahbariga (rahbar o'rinbosariga) maxsus huquqiy rejim ishtirokchisi sifatida ro'yxatdan o'tkazish yoki ro'yxatdan o'tkazishni rad etish to'g'risida xulosa kiritadi;

investitsiya platformalari operatorlari reyestrini yuritadi;

maxsus huquqiy rejim ishtirokchilari tomonidan ushbu Nizom va qonunchilik talablariga rioya etilishi ustidan monitoring va nazoratni amalga oshiradi;

maxsus huquqiy rejim ishtirokchisi maqomidan mahrum etish bo'yicha vakolatli davlat organi rahbariga (rahbar o'rinbosariga) takliflar kiritadi.

5. Arizachilar tomonidan taqdim etilgan ariza va hujjatlarni ko'rib chiqish hamda maxsus huquqiy rejim ishtirokchisini ro'yxatdan o'tkazish uchun yig'im undirilmaydi.

## 2-bob. Maxsus huquqiy rejim ishtirokchilarini ro'yxatdan o'tkazish talablari va shartlari

6. Maxsus huquqiy rejim ishtirokchisi sifatida ro'yxatdan o'tkazish talablari va shartlari quyidagilardan iborat:

a) investitsiyalarni jalb etishni tashkil etish faoliyati faqat O'zbekiston Respublikasi rezidenti bo'lgan yuridik shaxslar tomonidan amalga oshirilishi;

b) investitsiya platformasining O'zbekiston Respublikasi hududida joylashgan serverlarda mavjud bo'lishi;

c) investitsiya platformasining dasturiy ta'minoti va texnik vositalari amaldagi qonunchilikda belgilangan shaxsga doir ma'lumotlarni, mualliflik va turdosh huquqlarni himoya qilish talablariga muvofiq bo'lishi;

d) investitsiya platformasi quyidagi asosiy funksiyalarni uzluksiz bajarishi:

investitsiyalarni jalb qilish (investitsiya taklifi) va investitsiyalarni joylashtirish bo'yicha arizalarni qabul qilish, ro'yxatdan o'tkazish, qayta ishlash va monitoringini olib borish;

investitsiya platformasi operatorining investitsiyalarni jalb qiluvchi shaxs va investor bilan tuzadigan elektron shartnomalarini, shuningdek investitsiyalarni jalb qiluvchi shaxs va investor o'rtasidagi investitsiya shartnomalarini tuzish va qayta ishlash;

investitsiya platformasi tomonidan ko'rsatilgan xizmatlar uchun to'lov (komissiya) undirish;

statistik ma'lumotlar va hisobot hujjatlarini tayyorlash hamda shakllantirish;

investitsiyalarni jalb qilishga ko'maklashish xizmatlarini ko'rsatish va investitsiya shartnomalarini investitsiya platformasi orqali tuzilgan holda hisobga olish reyestrini yuritish;

qonunchilik talablariga muvofiq axborotni saqlash, qayta ishlash va oshkor etish;

davlat organlari va tijorat banklarining axborot tizimlari bilan elektron hamkorlik qilish;

e) jinoiy faoliyatdan olingan daromadlarni legallashtirish, terrorizmni moliyalashtirish, ommaviy qirg'in qurollarini tarqatishni moliyalashtirishga qarshi kurashish hamda shaxsga doir ma'lumotlarni saqlash va ulardan foydalanish sohasidagi qonunchilik talablariga rioya etishi;

f) investitsiyalarni jalb qilish, investitsiya platformasi ishtirokchilarining identifikatsiya ma'lumotlari, investitsiya platformasi ishtirokchilari (jumladan, ular o'rtasida) bilan munosabatlarga oid materiallar, shuningdek ish yuritish yozishmalari bo'yicha axborotni besh yil davomida saqlashi;

g) vakolatli davlat organining so'rovi bo'yicha investitsiya platformasi faoliyatini amalga oshirish bilan bog'liq axborotni bepul taqdim etishi;

h) investitsiya platformasi operatori tomonidan tasdiqlangan investitsiya platformasi xizmatlarini ko'rsatish tartibi va tariflari o'zining veb-saytida joylashtirishi;

i) quyidagi shaxslarning investitsiya platformasi operatorining direktori, direktor o'rinbosarlari va bosh buxgalteri bo'lishiga yo'l qo'yilmasligi:

terroristik faoliyatda yoki ommaviy qirg'in qurollarini tarqatishda ishtirok etgan yoki ishtirok etishda gumon qilinayotgan shaxslar;

iqtisodiy jinoyatlar, shuningdek, jinoiy faoliyatdan olingan daromadlarni legallashtirish, terrorizmni moliyalashtirish, ommaviy qirg'in qurollarini tarqatishni moliyalashtirish, uyushgan jinoyatchilik, korrupsiya, boshqaruv tartibiga qarshi jinoyatlar sodir etganlik uchun sudlanganligi tugallanmagan yoki olib tashlanmagan shaxslar;

moliya-iqtisod, yuridik, matematika yoki axborot texnologiyalari mutaxassisliklaridan kamida bittasi bo'yicha oliy ma'lumotli bo'lmagan shaxslar;

qimmatli qog'ozlar bozoridagi professional faoliyatni amalga oshiruvchi tashkilotlarda, fond birjalarida yoxud iqtisodiy, bank, moliyaviy va yuridik faoliyat sohaslarida, axborot texnologiyalari sohasida yoki ko'rsatib o'tilgan yo'nalishlar bo'yicha davlat boshqaruvi organlarida kamida ikki yillik ish stajiga ega bo'lmagan shaxslar;

j) mazkur bandning "i" kichik bandi **ikkinchi** va **uchinchi xatboshilarida** ko'rsatilgan shaxslarning platforma operatorining ustav fondida (kapitalida) ishtirok etishiga yo'l qo'yilmasligi;

k) investitsiyalarni jalb qiluvchi shaxslar va investorlarning so'rov va takliflarini qabul qilish, investitsiyalarni jalb qilishga ko'maklashish xizmatlari shartnomalarini, investitsiyalarni

joylashtirishga ko'maklashish xizmatlari shartnomalarini, shuningdek investitsiya shartnomalarini hisobga olish vazifasi yuklatilgan kamida bitta xodimning mavjud bo'lishi;

1) vakolatli davlat organiga va (yoki) investorlarga ataylab noto'g'ri axborot tarqatmasligi (taqdim etmasligi).

### **3-bob. Arizani taqdim etish va ko'rib chiqish**

7. Maxsus huquqiy rejim ishtirokchisi sifatida ro'yxatdan o'tkazish uchun arizachi ushbu Nizomning 2-ilovasiga muvofiq shakldagi arizani quyidagi ma'lumotlar va hujjatlar bilan birga vakolatli davlat organiga taqdim etadi:

ushbu Nizomning 3-ilovasiga muvofiq shaklda anketa;

ushbu Nizomning 4-ilovasiga muvofiq shaklda arizachining rahbariyati (rahbar, uning o'rinbosarlari) va ta'sischilari to'g'risidagi ma'lumotlar;

arizachining xorijiy fuqarolari bo'lgan rahbarlari va ta'sischilari uchun — tegishli chet davlat vakolatli organi tomonidan belgilangan tartibda legallashtirilgan yoki apostil qo'yilgan, ushbu Nizomning 6-bandining "i" kichik bandida ko'rsatilgan jinoyatlar bo'yicha sudlanmaganligi to'g'risidagi ma'lumotnoma va uning O'zbekiston Respublikasi davlat tiliga notarial tasdiqlangan tarjimasini.

O'zbekiston Respublikasi fuqarolari — arizachining rahbarlari (rahbar, uning o'rinbosarlari) va ta'sischilariga nisbatan ushbu Nizomning 6-bandi "i" kichik bandida nazarda tutilgan ma'lumotlarni vakolatli davlat organi mustaqil ravishda tekshiradi.

Ushbu badda ko'rsatilgan hujjatlar arizachining rahbari tomonidan imzolangan (tasdiqlangan) bo'lishi lozim.

Ariza va hujjatlar vakolatli davlat organiga qog'oz shaklida yoki elektron shaklda yoxud vakolatli davlat organining elektron pochta manziliga yuborish orqali taqdim etiladi.

8. Elektron shaklda taqdim etiladigan ma'lumotlar yuqori sifatli bo'lishi va "PDF", "PNG" yoki "JPEG" formatida bo'lishi lozim.

### **4-bob. Arizani ko'rib chiqish va qaror qabul qilish**

9. Vakolatli davlat organi ariza qabul qilingan kundan boshlab yigirma ish kuni ichida arizachini maxsus huquqiy rejim ishtirokchisi sifatida ro'yxatdan o'tkazish yoki ro'yxatdan o'tkazishni rad etish to'g'risida qaror qabul qiladi.

Agar ariza va taqdim etilgan hujjatlarni qo'shimcha tekshirish zarurati tug'lsa, tegishli mutaxassislarini jalb qilgan holda ishchi organning taklifi asosida vakolatli davlat organi rahbari (yoki uning o'rinbosari) tomonidan arizani ko'rib chiqish muddati o'n ish kunigacha uzaytirilishi mumkin. Bu haqda arizachiga o'sha kuni xabar beriladi.

10. Ishchi organ ariza va taqdim etilgan hujjatlarni o'n besh ish kuni davomida, zarur hollarda qo'shimcha o'rganish lozim bo'lsa, yigirma besh ish kuni davomida ko'rib chiqadi hamda ko'rib chiqish natijalari bo'yicha xulosa tayyorlab, vakolatli davlat organi rahbariga (yoki uning o'rinbosariga) taqdim etadi.

11. Vakolatli davlat organi rahbari (yoki uning o'rinbosari) ishchi organ xulosasi taqdim etilgan kundan boshlab besh ish kuni ichida arizachini maxsus huquqiy rejim ishtirokchisi sifatida ro'yxatdan o'tkazish yoki ro'yxatdan o'tkazishni rad etish to'g'risida qaror qabul qiladi.

12. Arizachini maxsus huquqiy rejim ishtirokchisi sifatida ro'yxatdan o'tkazishni rad etish uchun asoslar quyidagilardan iborat:

arizachi ushbu Nizomning 6-bandida belgilangan talablarga muvofiq bo'lmaganda;

mazkur Nizomning 7-bandida ko'rsatilgan ma'lumotlar va hujjatlar to'liq taqdim etilmaganda yoxud noto'g'ri yoki buzib ko'rsatilgan ma'lumotlarni o'z ichiga olgan hujjatlar taqdim etilganda;

Arizachining mansabdor shaxslari va ta'sischilari iqtisodiy jinoyatlar, shuningdek, jinoiy faoliyatdan olingan daromadlarni legallashtirish, terrorizmi moliyalashtirish, ommaviy qirg'in qurollarini tarqatishni moliyalashtirish, uyushgan jinoyatchilik, korrupsiya, boshqaruv tartibiga qarshi jinoyatlar ishtirok etganligi yoki ishtirok etishda gumon qilinayotganligi to'g'risida ma'lumotlar mavjud bo'lganda.

13. Maxsus huquqiy rejim ishtirokchisi sifatida ro'yxatdan o'tkazish rad etilgan taqdirda, ishchi organ tomonidan arizachiga rad etish sabablari ko'rsatilgan xabarnoma bir ish kuni ichida yuboriladi.

14. Arizachi xabarnoma olingan kundan boshlab o'ttiz kun ichida rad etish asoslarini bartaraf etgan holda takroran ariza berishi mumkin.

Takroran berilgan ariza bo'yicha o'n ish kuni ichida arizachini maxsus huquqiy rejim ishtirokchisi sifatida ro'yxatdan o'tkazish yoki ro'yxatdan o'tkazishni rad etish haqida qaror qabul qilinadi.

Mazkur bandning **birinchi xatboshisida** ko'rsatilgan muddat o'tgandan so'ng takroran topshirilgan arizalar ushbu Nizomda belgilangan tartibda umumiy asoslarda ko'rib chiqiladi.

15. Maxsus huquqiy rejim ishtirokchisi sifatida ro'yxatdan o'tkazish to'g'risida qaror qabul qilingan taqdirda, ishchi organ bir ish kuni ichida reyestrda tegishli ma'lumotlarni kiritadi va arizachiga xabarnoma yuboradi.

Ishchi organ ro'yxatdan o'tkazish to'g'risida qaror qabul qilingan kundan boshlab uch ish kuni ichida arizachini ushbu qaror bilan yozma shaklda tanishtiradi.

### **5-bob. Maxsus huquqiy rejim ishtirokchisi faoliyatini monitoring qilish va maxsus huquqiy rejim ishtirokchisi maqomidan mahrum qilish**

16. Investitsiya platformasining faoliyati ushbu Nizomning **5-ilovasida** belgilangan Investitsiya platformasi faoliyatini amalga oshirish tartibiga muvofiq amalga oshiriladi.

17. Ishchi organ maxsus huquqiy rejim ishtirokchilarining faoliyati hamda maxsus huquqiy rejim talablari va shartlariga rioya etilishi ustidan doimiy monitoring olib boradi.

18. Maxsus huquqiy rejim ishtirokchilari har oyning beshinchi sanasiga qadar vakolatli davlat organi tomonidan tasdiqlangan shaklga muvofiq o'z faoliyati to'g'risida vakolatli davlat organiga hisobot taqdim etadi.

19. Maxsus huquqiy rejim ishtirokchisi maqomidan mahrum qilish uchun quyidagilar asos bo'ladi:

maxsus huquqiy rejim ishtirokchisining maxsus huquqiy rejim ishtirokchisi maqomidan voz kechish to'g'risidagi arizasi;

maxsus huquqiy rejim ishtirokchisi sifatida ro'yxatdan o'tkazish uchun taqdim etilgan hujjatlarda noto'g'ri ma'lumotlar ko'rsatilganligi aniqlanganda;

maxsus huquqiy rejim ishtirokchisi tomonidan vakolatli davlat organiga ketma-ket ikki oy davomida hisobot taqdim etilmaganda;

maxsus huquqiy rejim ishtirokchisi to'lovga qobiliyatsiz deb topilganda;

maxsus huquqiy rejim ishtirokchisi tomonidan mazkur Nizomning **5-ilovasi** bilan tasdiqlangan Investitsiya platformasi faoliyatini amalga oshirish tartibi talablariga rioya qilinmaganda;

maxsus huquqiy rejim ishtirokchisining mazkur Nizomning **6-bandida** belgilangan talablarga muvofiq emasligi faktlari aniqlanganda.

20. Vakolatli davlat organi ushbu Nizomning **19-bandida** ko'rsatilgan holatlar aniqlangan kundan boshlab uch ish kuni ichida maxsus huquqiy rejim ishtirokchisi maqomidan mahrum qilish to'g'risida qaror qabul qiladi.

21. Ishchi organ maxsus huquqiy rejim ishtirokchisi maqomidan mahrum qilish to'g'risida qaror qabul qilingan paytdan boshlab bir ish kuni ichida reyestrda tegishli ma'lumotlarni kiritadi va bu haqda yuridik shaxsni xabardor qiladi.

### **6-bob. Investitsiya platformalari operatorlari reyestrini yuritish**

22. Ishchi organ tomonidan reyestr yuritiladi va unda quyidagi ma'lumotlar ko'rsatiladi:

maxsus huquqiy rejim ishtirokchisining to'liq nomi, tashkiliy-huquqiy shakli, joylashgan joyi (pochta manzili), elektron pochta manzili, telefon raqami;

investitsiya platformasining nomi va Internet jahon axborot tarmog'idagi manzili;

litsenziya yoki ruxsat etish xususiyatiga ega hujjatlar to'g'risidagi ma'lumotlar;

maxsus huquqiy rejim ishtirokchisining ro'yxatdan o'tkazilgan raqami va sanasi;

maxsus huquqiy rejim ishtirokchisi maqomidan mahrum qilish asoslari va sanasi.

23. Reyestrda mavjud ma'lumotlar vakolatli davlat organining rasmiy veb-saytiga joylashtiriladi.

### 7-bob. Yakuniy qoidalar

24. Reyestrda kiritilmagan shaxslar mazkur Nizomga muvofiq investitsiyalarni jalb etishni tashkil etish bo'yicha faoliyatni amalga oshirishga haqli emas.

25. Manfaatdor shaxslar vakolatli davlat organi tomonidan qabul qilingan qarorlar yuzasidan belgilangan tartibda sudga shikoyat qilishlari mumkin.

26. Mazkur Nizom talablarining buzilishida aybdor bo'lgan shaxslar qonunchilikka muvofiq javobgar bo'ladilar.

Investitsiya platformalari sohasida "Tartibga solish qumdoni" maxsus huquqiy rejimini taqdim qilish tartibi  
to'g'risidagi [nizomga](#)  
1-ILOVA

### Investitsiya platformalari sohasida "Tartibga solish qumdoni" maxsus huquqiy rejimi ishtirokchilarini ro'yxatdan o'tkazish

#### SXEMASI

| Bosqichlar | Mas'ullar               | Tadbirlar                                                                                                                                                                                                                                                                                                                                                                                                    | Ijro muddati                                                       |
|------------|-------------------------|--------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|--------------------------------------------------------------------|
| 1-bosqich  | Arizachi                | 1. Investitsiya platformalari sohasida "Tartibga solish qumdoni" maxsus huquqiy rejimining (bundan buyon matnda maxsus huquqiy rejim deb yuritiladi) ishtirokchisi sifatida ro'yxatdan o'tish uchun ariza va hujjatlarni tayyorlaydi.<br>2. Ariza va hujjatlarni O'zbekiston Respublikasi Istiqbolli loyihalar milliy agentligiga (bundan buyon matnda vakolatli davlat organi deb yuritiladi) taqdim etadi. | O'z xohishiga ko'ra                                                |
| 2-bosqich  | Vakolatli davlat organi | Ariza va hujjatlarni ko'rib chiqadi hamda arizachini maxsus huquqiy rejim ishtirokchisi sifatida ro'yxat o'tkazish yoki ro'yxatdan o'tkazishni rad etish to'g'risida qaror qabul qiladi.                                                                                                                                                                                                                     | 20 ish kuni, uzaytirilgan taqdirda — 30 ish kuni                   |
|            | Vakolatli davlat organi | 1. Ishchi organ ariza va hujjatlarni ko'rib chiqadi hamda arizachini maxsus huquqiy rejim ishtirokchisi sifatida ro'yxatdan o'tkazish yoki ro'yxatdan o'tkazishni rad etish to'g'risida xulosa tayyorlaydi.<br>2. Ishchi organ xulosasi asosida maxsus huquqiy rejim ishtirokchisi sifatida ro'yxatdan o'tkazish yoki ro'yxatdan o'tkazishni rad etish to'g'risida qaror qabul qiladi.                       | 15 ish kuni, uzaytirilgan taqdirda — 25 ish kuni<br><br>5 ish kuni |
| 3-bosqich  | Ishchi organ            | Arizachini maxsus huquqiy rejim ishtirokchisi sifatida ro'yxatdan o'tkazish rad etilgan taqdirda, bu haqda arizachiga rad etish asoslarini ko'rsatgan                                                                                                                                                                                                                                                        | 1 ish kuni                                                         |

|           |                                    |                                                                                                                                                                                                                                                                                                                                                                                                                                                                                                                             |                                                |
|-----------|------------------------------------|-----------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|------------------------------------------------|
|           |                                    | holda xabarnoma yuboradi.                                                                                                                                                                                                                                                                                                                                                                                                                                                                                                   |                                                |
| 4-bosqich | Arizachi                           | Maxsus huquqiy rejim ishtirokchisi sifatida ro'yxatga o'tkazishni rad etish asoslarini bartaraf etgan holda takroran ariza beradi.                                                                                                                                                                                                                                                                                                                                                                                          | 30 kun                                         |
|           | Vakolatli davlat organi            | <p>1. Takroran berilgan ariza bo'yicha arizachini maxsus huquqiy rejim ishtirokchisi sifatida ro'yxatga o'tkazish yoki ro'yxatga o'tkazishni rad etish haqida qaror qabul qiladi.</p> <p>2. Mazkur muddat o'tganidan so'ng takroran taqdim etilgan arizalarni ushbu Nizomda belgilangan tartibda umumiy asoslarda ko'rib chiqadi.</p>                                                                                                                                                                                       | <p>10 ish kuni</p> <p>Belgilangan muddatda</p> |
| 5-bosqich | Ishchi organ                       | <p>1. Maxsus huquqiy rejim ishtirokchisi sifatida ro'yxatdan o'tkazish to'g'risida qaror qabul qilingan taqdirda, tegishli ma'lumotlar reyestrda kiritiladi va arizachiga xabarnoma yuboriladi.</p> <p>2. Arizachini maxsus huquqiy rejim ishtirokchisi sifatida ro'yxatdan o'tkazish to'g'risidagi qaror bilan yozma ravishda tanishtiradi hamda maxsus huquqiy rejimning talablari va shartlariga rioya qilinmagan taqdirda, maxsus huquqiy rejim ishtirokchisi maqomidan mahrum qilinishi to'g'risida ogohlantiradi.</p> | <p>1 ish kuni</p> <p>3 ish kuni</p>            |
| 6-bosqich | Maxsus huquqiy rejim ishtirokchisi | Nomi yoki yashash joylashgan yeri (pochta manzili) o'zgargan taqdirda vakolatli davlat organiga ko'rsatib o'tilgan ma'lumotlarni tasdiqlovchi tegishli hujjatlarni ilova qilgan holda ariza beradi.                                                                                                                                                                                                                                                                                                                         | 5 ish kuni                                     |
|           | Vakolatli davlat organi            | Arizani qabul qilgandan so'ng reyestrda tegishli o'zgartirishlar kiritadi.                                                                                                                                                                                                                                                                                                                                                                                                                                                  | 1 ish kuni                                     |
| 7-bosqich | Vakolatli davlat organi            | Mazkur Nizomda ko'rsatilgan holatlar aniqlangan taqdirda, maxsus huquqiy rejim ishtirokchisini maqomidan mahrum qilish to'g'risida qaror qabul qiladi.                                                                                                                                                                                                                                                                                                                                                                      | 3 ish kuni                                     |
|           | Ishchi organ                       | Ishchi organ maxsus huquqiy rejim ishtirokchisi maqomidan mahrum qilish to'g'risidagi qaror asosida reyestrda tegishli ma'lumotlarni kiritadi hamda bu haqda tegishli yuridik shaxsni xabardor qiladi.                                                                                                                                                                                                                                                                                                                      | 1 ish kuni                                     |

Investitsiya platformalari sohasida “Tartibga solish qumdoni” maxsus huquqiy rejimini taqdim qilish tartibi  
to‘g‘risidagi **nizomga**  
2-ILOVA

**ARIZA**

|    |                                                                                                   |  |
|----|---------------------------------------------------------------------------------------------------|--|
| 1. | Yuridik shaxsning (arizachining) nomi:                                                            |  |
| 2. | Yuridik manzili (pochta manzili):                                                                 |  |
| 3. | Elektron pochta manzili:                                                                          |  |
| 4. | Telefon raqami:                                                                                   |  |
| 5. | Soliq to‘lovchining identifikatsiya raqami (STIR):                                                |  |
| 6. | Xizmat ko‘rsatuvchi bank:                                                                         |  |
| 7. | Rahbarning familiyasi va ismi:                                                                    |  |
| 8. | Ariza topshirishga vakolatli shaxsning familiyasi, ismi, telefon raqami, elektron pochta manzili: |  |

Sizdan, investitsiya platformalari sohasida “Tartibga solish qumdoni” maxsus huquqiy rejimi doirasida

(murojaat maqsadi: maxsus huquqiy rejim ishtirokchisi sifatida ro‘yxatdan o‘tish)

ruxsat berishingizni so‘raymiz.

Arizaga quyidagilar ilova qilinadi:

1. Anketa \_\_ varaqda.
2. Yuridik shaxs (arizachi) ustavi va boshqa ta‘sis hujjatlari nusxasi.
3. Yuridik shaxsning rahbariyati (rahbar, uning o‘rinbosarlari) va ta‘sischilari to‘g‘risidagi ma‘lumotlar.

**Yuridik shaxs rahbarining imzosi**

**20\_\_ yil “\_\_” \_\_\_\_\_**

Investitsiya platformalari sohasida “Tartibga solish qumdoni” maxsus huquqiy rejimini taqdim qilish tartibi  
to‘g‘risidagi **nizomga**  
3-ILOVA

**Investitsiya platformalari sohasida “Tartibga solish qumdoni” maxsus huquqiy rejimi  
ishtirokchisi sifatida ro‘yxatdan o‘tish uchun arizachining**

**ANKETASI**

**1-bob. Arizachi haqida ma‘lumot**

|                                                   |  |
|---------------------------------------------------|--|
| Yuridik shaxsning (arizachining) nomi             |  |
| Joylashgan joyi (manzili)                         |  |
| Telefon raqami                                    |  |
| Elektron pochta manzili                           |  |
| Rasmiy veb-sayti                                  |  |
| Yuridik shaxs (arizachi) ro‘yxatdan o‘tgan davlat |  |
| Doimiy faoliyat yuritish joyi                     |  |
| Yuridik shaxsning (arizachining) davlat           |  |

## 2-bob. Arizachining faoliyati bilan bog'liq ma'lumotlar

|                                                                                                                                                                                                                                                             |
|-------------------------------------------------------------------------------------------------------------------------------------------------------------------------------------------------------------------------------------------------------------|
| 1. Arizachi to'g'risidagi ma'lumotlar, shu jumladan tashkilot tuzilmasi, ilgari erishilgan yutuqlar va faoliyat yo'nalishi                                                                                                                                  |
| 2. Arizachining yirik ta'sischi(lari) (aksiyalarining/ulushlarining kamida 25 foiziga egalik qiluvchi) va ijro organi/boshqaruv a'zolari (boshqaruv raisi, bosh direktor, direktorlar) ning ushbu sohadagi bilim va ish tajribasi to'g'risidagi ma'lumotlar |
| 3. Arizachining moliyaviy holati to'g'risidagi ma'lumotlar (oxirgi moliyaviy yil holatiga arizachining moliyaviy hisobotning auditorlik tekshiruvidan o'tkazilgan yillik moliyaviy hisoboti bo'yicha)                                                       |
| 4. Arizachining litsenziya yoki ruxsat etish xususiyatiga ega hujjatlari to'g'risidagi ma'lumotlar                                                                                                                                                          |

## 3-bob Investitsiya platformalari sohasida "Tartibga solish qumdoni" maxsus huquqiy rejimi doirasida amalga oshirilishi mo'ljallangan faoliyat haqidagi ma'lumotlar:

|                                                                                                                                                                                                                                                                      |
|----------------------------------------------------------------------------------------------------------------------------------------------------------------------------------------------------------------------------------------------------------------------|
| 1. Amalga oshirilishi mo'ljallangan faoliyat haqidagi ma'lumotlar, shu jumladan, arizachining mazkur faoliyatni amalga oshirish bo'yicha boshqa bozorlardagi tajribasi va investitsiya platformalarining rivojlanishiga yordam berishi to'g'risidagi obyektiv tahlil |
| 2. Arizachi tomonidan faoliyatni amalga oshirish uchun foydalaniladigan texnik tizimlar va yechimlar                                                                                                                                                                 |
| 3. Amalga oshirilishi mo'ljallangan faoliyatni boshlashning taxminiy sanasi                                                                                                                                                                                          |

## 4-bob. Deklaratsiyalash

|                                                                                                                                                                                                                                                                                                                                     |    |      |
|-------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|----|------|
| 1. Arizachi:<br>har qanday jinoyat uchun tergovda qatnashgan, ayblanayotgan, sudlangan yoxud har qanday jinoiy ta'qib ostida bo'lganmi yoki hozirda mavjudmi yoxud so'nggi 5-yil ichida tan olingan xorijiy yurisdiksiyadagi biron bir tartibga soluvchi yoki litsenziyalovchi organ tomonidan intizomiy javobgarlikka tortilganmi? | Ha | Yo'q |
| 2. Arizachiga sud tartibida to'lovga qobiliyatsizlik tartib-taomillari qo'llanilganmi?                                                                                                                                                                                                                                              | Ha | Yo'q |
| (Yuqorida ko'rsatib o'tilgan savollarga ijobiy javob berilgan taqdirda, quyida batafsil ma'lumotlar ko'rsatilishi lozim)                                                                                                                                                                                                            |    |      |

Mazkur anketa va unga ilova qilingan hujjatlardagi ma'lumotlarning haqiqiyliigi va to'g'riligini hamda noto'g'ri yoki buzib ko'rsatilgan ma'lumotlar berilmaganligini tasdiqlayman.

Arizam qanoatlantirilganidan keyin taqdim etgan hujjatlarimda noto'g'ri yoki buzib ko'rsatilgan ma'lumotlar aniqlangan taqdirda, maxsus huquqiy rejim ishtirokchisi maqomidan mahrum etilishim mumkinligini tushunaman.

|                                                              |                         |
|--------------------------------------------------------------|-------------------------|
| Lavozimi                                                     |                         |
|                                                              |                         |
| Telefon raqami                                               | Elektron pochta manzili |
|                                                              |                         |
| Vakolatli shaxs imzosi                                       |                         |
| Sana:                                                        |                         |
| Qo'shimcha aloqa uchun shaxs (agar yuqoridagidan farq qilsa) |                         |
|                                                              |                         |
| Lavozimi                                                     |                         |
|                                                              |                         |
| Telefon raqami                                               | Elektron pochta manzili |
|                                                              |                         |

Investitsiya platformalari sohasida “Tartibga solish qumdoni” maxsus huquqiy rejimini taqdim qilish tartibi  
to‘g‘risidagi [nizomga](#)  
4-ILOVA

**Yuridik shaxs (arizachining) rahbariyati (rahbari va o‘rinbosarlari) va ta‘sischilari haqidagi  
MA’LUMOT**

1-jadval

| Yuridik shaxs rahbariyati (rahbari va o‘rinbosarlari) |                  |            |                             |                  |                                       |                        |
|-------------------------------------------------------|------------------|------------|-----------------------------|------------------|---------------------------------------|------------------------|
| Lavozimi                                              | Familiyasi, ismi | Fuqaroligi | Shaxsni tasdiqlovchi hujjat |                  |                                       |                        |
|                                                       |                  |            | Hujjat turi                 | Seriya va raqami | Berilgan vaqti va amal qilish muddati | Kim tomonidan berilgan |
| 1                                                     | 2                | 3          | 4                           | 5                | 6                                     | 7                      |
|                                                       |                  |            |                             |                  |                                       |                        |
|                                                       |                  |            |                             |                  |                                       |                        |

2-jadval

| Yuridik shaxs ta‘sischilari              |               |                                                                                                   |                                                                                        |                  |                                       |                        |
|------------------------------------------|---------------|---------------------------------------------------------------------------------------------------|----------------------------------------------------------------------------------------|------------------|---------------------------------------|------------------------|
| Familiyasi, ismi yoki yuridik shaxs nomi | Ulush miqdori | Fuqaroligi (jismoniy shaxslar uchun) yoki davlat ro‘yxatidan o‘tgan joyi (yuridik shaxslar uchun) | Shaxsini tasdiqlovchi hujjat yoki davlat ro‘yxatdan o‘tkazilganligi haqidagi guvohnoma |                  |                                       |                        |
|                                          |               |                                                                                                   | Hujjat turi                                                                            | Seriya va raqami | Berilgan vaqti va amal qilish muddati | Kim tomonidan berilgan |
| 1                                        | 2             | 3                                                                                                 | 4                                                                                      | 5                | 6                                     | 7                      |
|                                          |               |                                                                                                   |                                                                                        |                  |                                       |                        |
|                                          |               |                                                                                                   |                                                                                        |                  |                                       |                        |

Investitsiya platformalari sohasida “Tartibga solish qumdoni” maxsus huquqiy rejimini taqdim qilish tartibi  
to‘g‘risidagi [nizomga](#)  
5-ILOVA

## Investitsiya platformasi faoliyatini amalga oshirish

### TARTIBI

Mazkur Tartib investitsiya platformasida faoliyatni amalga oshirish, investitsiya platformasi operatori, investorlar va investitsiyalarni jalb qiluvchi shaxslarning o'zaro hamkorligi tartibini, shuningdek, investitsiya platformasi ishtirokchilarining huquqlari, majburiyatlari va javobgarligini belgilaydi.

#### 1-bob. Umumiy qoidalar

1. Ushbu Tartibda quyidagi asosiy tushunchalar qo'llaniladi:

**investitsiya platformasi qoidalari** (bundan buyon matnda Qoidalar deb ataladi) — investitsiya platformasida xizmat ko'rsatish, ishtirokchilarning huquq va majburiyatlarini, investitsiya jalb qilish va kiritish, hisob-kitob qilish va ma'lumotlarni oshkor qilish tartibini belgilovchi investitsiya platformasi operatori (bundan buyon matnda operator deb yuritiladi) tomonidan tasdiqlanadigan hujjat;

**investitsiya platformasi ishtirokchilari** (bundan buyon matnda ishtirokchilar deb yuritiladi) — operator, investorlar, investitsiyalarni jalb qiluvchi shaxslar, shuningdek, qoidalarda nazarda tutilgan hollarda investitsiya platformasida operatsiyalarga qo'yilgan boshqa shaxslar;

**investitsiyalarni jalb qiluvchi shaxs** (bundan buyon matnda loyiha egasi deb yuritiladi) — O'zbekiston Respublikasi rezidenti bo'lgan yuridik shaxs yoki yakka tartibdagi tadbirkor bo'lib, unga investitsiyalarni jalb qilish xizmatlarini operator ko'rsatadi;

**investitsiya taklifi** — loyiha egasining investitsiya shartnomasini tuzish to'g'risidagi taklifi;

**investitsiya shartnomasi** — investor va loyiha egasi o'rtasida investitsiya platformasidan foydalangan holda tuziladigan, investitsiya amalga oshiriladigan hamda tomonlarning huquq va majburiyatlarini belgilaydigan shartnoma;

**raqamli elektron guvohnoma** — investitsiya platformasi tomonidan shakllantiriladigan, investitsiya shartnomasi bo'yicha investitsiya amalga oshirilganligini tasdiqlaydigan va quyidagi rekvizitlarni o'z ichiga olgan elektron hujjat:

noyob identifikator;

shakllantirish sanasi va vaqti;

investitsiya shartnomasining tomonlari;

investitsiya summasi va obyeksi to'g'risidagi ma'lumotlar;

ijro holati;

mazkur Nizomda nazarda tutilgan boshqa ma'lumotlar;

**shartnomalar reyestri** — operator tomonidan investitsiya platformasida yuritiladigan, barcha investitsiya shartnomalari va ular bilan bog'liq operatsiyalar to'g'risidagi ma'lumotlar xronologik tartibda shakllantiriladigan elektron baza;

**nominal hisobvaraq** — investorlarning pul mablag'larini alohida hisobga olish va hisob-kitob qilish hamda ushbu Tartib va qoidalarga muvofiq loyihalar egalariga to'lovlarni amalga oshirish uchun O'zbekiston Respublikasi bankida ochilgan operatorning bank hisobvarag'i;

**eskrou-hisobvaraq** — operator yoki loyiha egasi tomonidan O'zbekiston Respublikasi bankida ochiladigan hisobvaraq bo'lib, unda investorlarning pul mablag'lari ularni loyiha egasiga o'tkazish yoki investorlarga qaytarish shartlari yuzaga kelguniga qadar saqlanadi.

#### 2-bob. Investitsiya platformasining ishlash tartibi

2. Investitsiyalarni jalb qilishni tashkil etish bo'yicha faoliyat operator tomonidan investitsiya platformasi orqali elektron shaklda tuziladigan ikki turdagi xizmat ko'rsatish shartnomalari asosida amalga oshiriladi:

loyiha egasi bilan investitsiyalarni jalb qilish bo'yicha xizmatlar ko'rsatish to'g'risidagi shartnoma, unga ko'ra operator investitsiya takliflarini joylashtirish va investitsiya shartnomalarini tuzish uchun zarur bo'lgan harakatlarni amalga oshirish uchun investitsiya platformasiga kirishni ta'minlash majburiyatini oladi;

investor bilan investitsiya kiritishda ko‘maklashish bo‘yicha xizmatlar ko‘rsatish to‘g‘risidagi shartnoma, u bo‘yicha operator investitsiya takliflari bilan tanishish, ularni qabul qilish (akseptlash) va investitsiya shartnomalarini tuzish uchun investitsiya platformasiga kirish imkoniyatini taqdim etish majburiyatini oladi.

Mazkur shartnomalar qo‘shilish shartnomalari hisoblanadi.

3. Qo‘shilish shartnomalari investor tomonidan investitsiya platformasidagi shaxsiy kabinetda elektron raqamli imzo yoki qoidalarda ko‘rsatilgan boshqa autentifikatsiya vositasi bilan tasdiqlanadigan harakatlarni bajarish orqali tuziladi. Bunda tuzilgan shartnomalar to‘g‘risidagi ma‘lumotlar shartnomalar reyestriga kiritiladi va ular bo‘yicha raqamli elektron guvohnoma shakllantiriladi.

4. Operator investor bilan shartnoma tuzilgunga qadar investitsiya kiritishda investordan investitsiya tavakkalchiliklari, shu jumladan qo‘yilgan mablag‘larni to‘liq yo‘qotish tavakkalchiligi bilan tanishganligini tasdiqlovchi hujjat oladi.

5. Investitsiya platformasida jismoniy shaxslar tomonidan quyidagi miqdorlardan ortiq investitsiya kiritish uchun cheklovlar belgilanishi lozim:

kalendar yil uchun investitsiya platformasi orqali investitsiyalarning umumiy hajmi — bazaviy hisoblash miqdorining 150 baravari;

bitta investitsiya taklifi bo‘yicha investitsiyalar hajmi — bazaviy hisoblash miqdorining 30 baravari.

Mazkur cheklovlar operator tomonidan jismoniy shaxslarning investitsiya kiritish bo‘yicha bilimlari va tajribasini baholash o‘tkazilganidan so‘ng olib tashlanishi mumkin.

Operator jismoniy shaxsning investitsiyalar, qimmatli qog‘ozlar bozori va tadbirkorlik faoliyati asoslari sohasidagi bilimlari va tajribasi darajasini baholash uchun bepul asosda test sinovlarini o‘tkazadi.

Test o‘tkazish uchun savollar ro‘yxati operator tomonidan mustaqil shakllantiriladi hamda investitsiya platformasida e‘lon qilinadi.

Testdan o‘tkazilayotgan shaxs savollarning umumiy sonidan kamida 75 foiziga to‘g‘ri javob topsa, test sinovi natijasi ijobiy deb baholanadi.

Test sinovi investitsiya platformasida onlayn shaklda o‘tkaziladi hamda test sinovi natijalari sinov yakunlangan vaqtda avtomatik shakllanadi va jismoniy shaxsning e‘tiboriga yetkaziladi. Bunda, har bir savol uchun jismoniy shaxsga kamida 1 daqiqa vaqt berilishi kerak.

Operator cheklovlar olib tashlangan jismoniy shaxslarning alohida reyestrini yuritadi va uni har oyning 5 sanasida vakolatli davlat organiga taqdim etadi.

Operator test sinovlarini o‘tkazish bilan bog‘liq barcha materiallarni, shu jumladan elektron ma‘lumotlar bazalarini kamida 5 yil davomida saqlashi va vakolatli davlat organi so‘roviga ko‘ra bir ish kuni ichida taqdim etishi shart.

6. Operator pul mablag‘larining hisob-kitoblarini faqat O‘zbekiston Respublikasi banklaridagi nominal hisobvaraqlar va (yoki) eskrou hisobvaraqlari orqali amalga oshiradi. Investorlarning pul mablag‘larini boshqa hisobvaraqlarga o‘tkazishga yo‘l qo‘yilmaydi, qoidalarda nazarda tutilgan operatorning mukofot puli summasi, shuningdek operator xizmatlariga belgilangan to‘lovlar hajmida haq to‘lash bundan mustasno.

### **3-bob. Ishtirokchilarni ro‘yxatdan o‘tkazish va kiritish**

7. Operator mijozlarni identifikatsiya qilish va lozim darajada tekshirishni amalga oshirganidan hamda jinoiy faoliyatdan olingan daromadlarni legallashtirish, terrorizmni moliyalashtirish va ommaviy qirg‘in qurolini tarqatishni moliyalashtirishga qarshi kurashish sohasidagi qonunchilik hujjatlariga muvofiq mijozlar va ularning benefitsiar mulkdorlari to‘g‘risidagi ma‘lumotlarni tekshirganidan so‘ng ishtirokchilarni shaxsiy kabinet orqali platformada ro‘yxatdan o‘tkazishni ta‘minlaydi.

8. Loyiha egasi uchun operator identifikatsiyadan tashqari quyidagilarni so‘raydi va tekshiradi:

a) ta‘sis hujjatlari, oxirgi benefitsiar mulkdorlar (jismoniy shaxsgacha), mulkchilik shakli va boshqaruv organlari to‘g‘risidagi ma‘lumotlar;

b) oxirgi hisobot yili uchun moliyaviy hisoboti (auditorlik tekshiruvdan o'tkazish majburiy bo'lganda, auditorlik xulosasi bilan birga);

c) investitsiyalarni jalb qilayotgan shaxslarda to'lovga qobiliyatsizlik alomatlari mavjud emasligi;

d) investitsiya loyihasini amalga oshirish, uni boshqarishda ishtirok etish va investitsiyalarni qaytarish tartibi to'g'risidagi ma'lumotlar, qo'yilgan investitsiya qaysi faoliyatga yo'naltirilishi, bu orqali investor bevosita yoki bilvosita egalik qiladigan mulk, investorning huquq va majburiyatlari, shuningdek tavakkalchiliklar to'g'risidagi ma'lumotlar;

e) investitsiya platformasida joylashtirish uchun taklif etilayotgan loyihaning O'zbekiston Respublikasi Prezidentining 2025-yil 21-avgustdagi PQ-255-son "Zamonaviy axborot texnologiyalaridan foydalangan holda amalga oshiriladigan investitsiya faoliyatini tartibga solish chora-tadbirlari to'g'risida"gi qarorining 2-bandida belgilangan yo'nalishlarga muvofiqligi;

f) ushbu Nizomning 14-bandida belgilangan cheklovlarning mavjud emasligi.

9. Operator investor-yuridik shaxslarni ro'yxatdan o'tkazishda ularning boshqaruv organlari va vakilining vakolatlarini, oxirgi benefitsiar mulkdorlari va soliq rezidenti maqomini tekshirishi shart.

10. Operator ishtirokchilarning doimiy monitoringini, shu jumladan ishchanlik obro'si, mablag'larning kelib chiqishi va qoidalarga rioya etilishi monitoringini amalga oshiradi.

Bunda, operator qonunchilik hujjatlari, ushbu Nizom va qoidalar talablarining buzilishi holatlari aniqlanganda, ishtirokchini va vakolatli davlat organini xabardor qilgan holda operatsiyalarga amalga oshirishni to'xtatib qo'yishga haqli.

#### **4-bob. Investitsiya taklifi**

11. Loyiha egasi investitsiya platformasida quyidagi ma'lumotlarni o'z ichiga olgan investitsiyalarni jalb qilish bo'yicha investitsiya taklifini joylashtiradi:

a) loyiha egasi to'g'risidagi ma'lumotlar, jumladan uning nomi, tashkiliy-huquqiy shakli, STIR, joylashgan joyi, oxirgi benefitsiar mulkdorlari va boshqaruv organlari to'g'risidagi ma'lumotlar, faoliyatning asosiy turlari, majburiyatlarning bajarilishiga ta'sir ko'rsatishi mumkin bo'lgan muhim omillar;

b) investitsiyalarni jalb etish maqsadlari, bitim shartlari va investitsiya kiritish usulining tavsifi;

c) investitsiya taklifining amal qilish muddati, investitsiya loyihasiga kiritiladigan umumiy investitsiyalarning minimal miqdori (yopilish chegarasi) va maksimal miqdori (to'xtatish chegarasi);

d) nominal va (yoki) eskrou hisobvaraqlari orqali hisob-kitob qilish tartibi, muddatlari va shartlari, shu jumladan investitsiya taklifining amal qilishi to'xtatilgandan so'ng mablag'larni loyiha egasiga o'tkazish muddati, shuningdek investitsiyalarning minimal miqdoriga erishilmaganda yoki qaytarish uchun boshqa asoslar yuzaga kelganda investorlarga mablag'larni qaytarish shartlari va tartibi;

e) agar qoidalarda nazarda tutilgan bo'lsa, loyiha egasining investorlar oldidagi majburiyatlarini bajarish jadvali;

f) tavakkalchiliklar, shu jumladan qo'yilgan mablag'larni yo'qotish tavakkalchiligi, jismoniy shaxslar uchun cheklovlar, investorning shartnoma tuzishdan bosh tortish shartlari to'g'risida ogohlantirish;

g) operatorga haq to'lash hamda investor va loyiha egasining boshqa xarajatlari to'g'risidagi ma'lumotlar;

h) mablag'larni jalb qilishning jarayoni, majburiyatlarning bajarilishi va investitsiya loyihasining amalga oshirilishi to'g'risidagi axborotni oshkor qilish tartibi.

12. Operator tomonidan investitsiya taklifidagi ma'lumotlarning to'liqligi, aniqligi, ishonchliligi tekshiruvdan o'tkaziladi, shundan so'ng operator investitsiya taklifini investitsiya platformasida joylashtirishga ruxsat beradi yoki bartaraf etilishi mumkin bo'lgan kamchiliklar ro'yxatini ko'rsatgan holda rad etadi.

13. Investitsiya platformasida quyidagi shaxslarning investitsiya loyihalari joylashtirilishiga yo'l qo'yilmaydi:

iqtisodiy jinoyatlar, shuningdek, jinoiy faoliyatdan olingan daromadlarni legallashtirish, terrorizمنى moliyalashtirish, ommaviy qirg'in qurollarini tarqatishni moliyalashtirish, uyushgan jinoyatchilik, korrupsiya, boshqaruv tartibiga qarshi jinoyatlar sodir etganlik uchun sudlanganligi tugallanmagan yoki olib tashlanmagan shaxslar;

terrorchilik faoliyatida yoki ommaviy qirg'in qurolini tarqatishda ishtirok etayotgan yoki ishtirok etishda gumon qilinayotgan shaxslar;

sud tomonidan muomalaga layoqatsiz yoki muomala layoqati cheklangan deb topilgan shaxslar;

sud tomonidan tadbirkorlik faoliyatini amalga oshirish huquqini cheklash tariqasidagi jazo qo'llanilgan shaxslar.

14. Investitsiya taklifi amal qilish muddati boshlanganidan keyin uning mazmunini va (yoki) shartlarini o'zgartirishga yo'l qo'yilmaydi.

15. Operator investitsiya platformasida jalb qilingan mablag'larning joriy miqdori, minimal va maksimal miqdorgacha bo'lgan qoldiq, shuningdek investitsiya taklifining amal qilishini to'xtatish sanasi va vaqtini aks ettirishni ta'minlashi shart.

### **5-bob. Investitsiya qilish tartibi**

16. Investitsiya shartnomasini tuzish investor tomonidan o'zining investitsiya platformasidagi shaxsiy kabineti orqali nominal va (yoki) eskrou hisobvarag'idagi pul mablag'larini kiritgan holda investitsiya taklifini qabul qilish (aksept) orqali amalga oshiriladi. Bunda, shartnoma investorning pul mablag'lari nominal va (yoki) eskrou hisobvarag'idan loyiha egasining bank hisobvarag'iga o'tkazilgan paytdan boshlab tuzilgan hisoblanadi.

17. Investor investitsiya taklifini akseptlangandan so'ng operatorga qoidalarda belgilangan muddat davomida, biroq investitsiya taklifining amal qilishi tugagan kundan kechiktirmay investitsiya platformasi orqali investitsiya kiritishni bekor qilish to'g'risida xabarnoma bergan holda investitsiya shartnomasini tuzishdan bosh tortishga haqli. Bunda operator investorning pul mablag'larini loyiha egasiga o'tkazmaydi va uch ish kuni ichida ularni investorga qaytarilishini ta'minlaydi.

18. Investitsiya taklifining amal qilish muddati uning eng kam miqdoriga yetmasdan tugagan taqdirda, investitsiya shartnomalari tuzilmaydi. Operator muddat tugagandan keyingi ish kunidan kechiktirmay bu haqida investorlarni xabardor qiladi va kiritilgan mablag'larni investorlarga qaytarishni tashkil etadi.

19. Investitsiyalarning maksimal miqdoriga erishilganda, operator akseptlarni qabul qilishni to'xtatadi va bu haqidagi axborotni e'lon qiladi. Mablag'larni loyiha egasiga o'tkazish qoidalarda belgilangan muddatda, biroq investitsiya taklifining amal qilishi to'xtatilgan kundan e'tiboran uch ish kunidan kechiktirmay amalga oshiriladi.

20. Investitsiya shartnomasi tuzilganligi fakti raqamli elektron guvohnoma va shartnomalar reyestridan ko'chirma bilan tasdiqlanadi.

21. Investorlarga mablag'larni qaytarish operator tomonidan quyidagi hollarda amalga oshiriladi:

investor tomonidan operatorga investitsiya kiritishni bekor qilish to'g'risida qoidalarda belgilangan muddatda xabarnoma yuborilganda;

investitsiya taklifiga minimal miqdorda mablag'lar kiritilmaganda;

mablag'lar loyiha egasiga o'tkazilgunga qadar vakolatli davlat organi yoki sudning qaroriga asosan investitsiya taklifi to'xtatilganda;

qoidalarda nazarda tutilgan boshqa hollarda.

Investorga mablag'larni qaytarish uni qaytarish uchun asos bo'lgan holatlar vujudga kelgan kundan e'tiboran uch ish kunidan kechiktirmay investorning bank hisobvarag'iga amalga oshiriladi.

22. Operator har bir investor bo'yicha nominal hisobvaraqdagi pul mablag'larining alohida hisobini yuritadi. Investor operatoridan so'rov bo'yicha o'zining operatsiyalari to'g'risidagi hisobotni qoidalarda belgilangan muddatda, biroq bir ish kunidan kechiktirmay olishga haqli.

23. Investor, agar qoidalarda boshqacha qoida nazarda tutilgan bo'lsa, nominal hisobvarag'ida turgan va investitsiya shartnomasini tuzishga yo'naltirilmagan pul mablag'larini istalgan vaqtda o'zining bank hisobvarag'iga o'tkazishni talab qilishga haqli.

24. Agar qoidalarda nazarda tutilgan bo'lsa, investorlarning nominal hisobvarag'idagi pul mablag'lariga foizlar hisoblashga yo'l qo'yiladi.

25. Loyiha egasi tomonidan investitsiya shartnomasi bo'yicha majburiyatlar buzilgan taqdirda, loyiha egasi investitsiya shartnomasida nazarda tutilgan mablag'larni bir oy muddatda operatorning tegishli nominal hisobvarag'iga o'tkazadi. Operator kelib tushgan mablag'larni shartnomalar reyestriga muvofiq investorlarga besh ish kuni ichida taqsimlaydi.

26. Investitsiya platformasi orqali investitsiya jalb qilishga ko'maklashish bo'yicha xizmatlar reklamasida quyidagi ma'lumotlar ko'rsatilishi kerak:

operator tomonidan axborotni oshkor qilish amalga oshiriladigan Internet jahon axborot tarmog'idagi sayt manzili;

investitsiya qilingan mablag'larning yo'qotish tavakkalchiligi yuqori ekanligi va ularning to'liq hajmda yo'qotilishi mumkinligi.

## **6-bob. Axborotni oshkor qilish va taqdim etish**

27. Operator investitsiya platformasida quyidagi ma'lumotlarni hamma foydalanishi uchun oshkor qiladi:

operator to'g'risidagi ma'lumotlar, shu jumladan mulkchilik shakli va boshqaruv organlari; investitsiya platformasi qoidalari;

investitsiya shartnomalarini tuzish va investitsiya kiritish tartibi;

loyiha egasi tomonidan majburiyatlar bajarilmagan taqdirda, investorning harakatlari;

operatorning hisobot davridagi faoliyati natijalari to'g'risidagi yillik hisoboti;

mazkur Nizomda nazarda tutilgan boshqa ma'lumotlar.

28. Operator investitsiya platformasida investorlarga loyihalar egalari va investitsiya takliflari to'g'risidagi quyidagi ma'lumotlar taqdim etilishini ta'minlaydi:

loyihalar egalari to'g'risidagi ma'lumotlar;

moliyaviy hisobot (auditorlik tekshiruvdan o'tkazish majburiy bo'lganda, auditorlik xulosasi bilan birga);

faoliyatning asosiy turlari;

muhim faktlar;

investitsiya taklifiga jalb qilingan mablag'lar hajmi;

investitsiya taklifiga doir tavakkalchiliklar to'g'risidagi ogohlantirishlar.

29. Investitsiya taklifi to'g'risidagi ma'lumot ko'zlangan maqsadlar va tavakkalchiliklar to'g'risida to'liq va xolisona tasavvur hosil qilish imkonini berishi, operator xizmatlari, vositachilik haqlari, mumkin bo'lgan qo'shimcha xarajatlar qiymati to'g'risidagi ma'lumotlarni, shuningdek, agar qo'llash mumkin bo'lsa, sotib olinadigan qimmatli qog'ozlar, ulushlar yoki boshqa harakatlar mazmunini o'z ichiga olishi kerak.

## **7-bob. Manfaatlar to'qnashuvi va javobgarlik**

30. Operator investitsiya takliflarida ishtirok etishga, shu jumladan o'z investitsiya platformasida loyiha egasi sifatida ishtirok etishga, ayrim shaxslarga axborotdan yoki investitsiya kiritish shartlaridan foydalanishda preferensiyalar taqdim etishga haqli emas.

31. Loyihalar egalari sifatida operatorning 20 foizdan ortiq ulushiga (aksiyalariga) ega bo'lgan shaxslar, uning boshqaruv organlari a'zolari, operator xodimlari, shuningdek, uning affillangan shaxslari ishtirok etishga yo'l qo'yilmaydi.

32. Operator manfaatlar to'qnashuvining oldini olish, uni aniqlash, boshqarish va oshkor qilishning ichki qoidalarini tasdiqlaydi hamda uni o'qishga qulay shaklda investitsiya platformasiga joylashtiradi.

33. Operator noto'g'ri, to'liq bo'lmagan yoki chalg'ituvchi ma'lumotlarni oshkor qilish, qoidalarga rioya qilmaslik, investitsiya platformasining ushbu Nizom talablariga muvofiq emasligi, nominal va (yoki) eskrou hisobvaraqlari bo'yicha hisob-kitoblar tartibini buzish oqibatida

investorlar va (yoki) loyihalar egalariga yetkazilgan zararlar hamda boshqa qoidabuzarliklar uchun qonunchilikka muvofiq javobgar bo‘ladi.

34. Operator loyihalar egalarining investorlar oldidagi majburiyatlari bo‘yicha javobgar bo‘lmaydi, qoidalarda nazarda tutilgan hollar bundan mustasno.

#### **8-bob. Yakuniy qoida**

35. Mazkur Nizom talablarining buzilishida aybdor bo‘lgan shaxslar qonunchilikka muvofiq javobgar bo‘ladilar.

*(Qonunchilik ma'lumotlari milliy bazasi, 14.01.2026 y., 10/26/3753/0041-son)*